



Ittoqqortoormiini umiarsualivissamik nutaamik Naalakkersuisut sanaartornissamut pilersaarusiornissamut (projektering) peqquneqarnissaannik Inatsisartut aalajangiiffigisassaattut siunnersuut, kingusinnerpaamik UKA 2026-imut.

(Inatsisartunut ilaasortaq Mette Arqe-Hammeken, Naleraq)

(Siullermeerneqarnera)

Qujanaq Inatsisartunut ilaasortaq Mette Arqe-Hammeken siunnersuummut pingaarutilimmut. Qularutissaanngilaq, Tunu tassanilu aamma Ittoqqortoormiit aningaasaliinissanik pisariaqartitsimmata, ineriartornermik, toqqissisimanermik siunissamullu upperinninnermut pilersitsinnaasunik. Nunap immikkoortortaa ukiorpassuarni tikkineqarsinnaanermigut, attaveqaasersuutitigut inuussutissarsiornermullu periarfissanut unammilligassaqartarsimavoq, paasinarluinnarlunilu, tigussaasunik iliuseqarnissamik ujartuisoqarnera.

Ittoqqortoormiit nunatut ataatsimoorussatsinnut oqaluttuarisaanitsinnullu ilaajuarsimavoq. Tassaniluuna inulernerqarnerup kingunerisimagaa, erfalasup ataatsip iluani ataatsimuulernerput. Taamaattumik inuiaqatigiittut akisussaaffeqarpugut qulakkiissallugu, innuttaasut Kangiani nunatta sinneratut assigiimmik periarfissaqarnissaat tikkineqarsinnaanissaallu.

Taamaattumik nuannerpoq, qanittumi Danmarkip Kalaallit Nunaatalu sinaakkutissatut isumaqatigiissuteqarnerminni aningaasanik tassungarpiaq nukittorsaataasussanik Tunumi attaveqaasersuutit nukittorsarnissaannut aningaasaliisimanagera. Tassanilu Ittoqqortoormiini mittarfimmik pilersitsinissamik pilersaarut pingaaruteqartutut qitiuvoq. Aningaasaliineq, siunissami innuttaasunut, takornariaqarnermut inuussutissarsiornermullu annertuumik pingaaruteqartussaq. Mittarfik angalanermut pisariillisaataasussaq, inuussutissarsiutinik nutaanik periarfissiisussaq aammalu niuernermik ineriartortitsinermillu pitsaanagerusumik pilersitsinissamut sinaakkusiisussaq.

Tassungalu ilutigalugu qularutissaanngilaq, Tunumi umiarsualiveqarnerup pitsanngorsartariaqarnera. Ittoqqortoormiini umiarsualiviup nutaap pilersuinermut isumannaallisaaneq nukittorsassavaa, aalisartut piniartullu atugaat pitsanngorsarlugu aammalu pisiassanik atortussanillu ukioq tamaat assartuineq pisariinnerulersissallugu. Inuussutissarsiutinik nutaanik pilersitsinissamut tunngaviusssaq innuttaasullu siunissami toqqissisimanarnerusumik toqqammavilissallugit.

Taamaattumik Demokraatit paasilluarsinnaavaat kissaatigineqartoq, oqaasiinnaanngitsumik timitaliinissaq, aammalu Kalaallit Nunaata Kangiani ineriartornerup pingaartinneqarnissaa. Nuannerpoq takullugu, maannakkut toraagalimmik pilersaarusiortoqarlunilu pingaartitsisoqarnera attaveqaasersuutinut



sinaakkutissatut isumaqatigiissut aqqutigalugu aammalu immikkoortunut pilersaarutini pioreersuni.

Tunami ineriartorneq nunat immikkoortuisa oqimaaqatigiisinnerinnaannik apeqqutaanngilaq.
Apeqqutaavoq ataqatigiisitsineq aammalu qulakkeerinnineq, nunatsinni innuttaasut tamarmik assigiimmik periarfissinneqarnissaannut.

Demokraatit iluarisimaarlugu takusinnaavaat, alloriartoqartoq, tigussaasunik pitsanngorsaataasinnaasunik, qilanaaraarpullu Nunatta kangiani tamarmi attaveqaasersuutitut aningaasaliissutissat malinnaaffiginissaat.

Taamatut oqaaseqaateqarluta Naalackersuisut allannguutissatut siunnersuutaat Sanaartornermut ataatsimiititaliami suliareqqinneqarnissaa innersuussutigaarput.